

Su Excelencia Minister President
Sra. mr. E. Wever-Croes
L.G. Smith Blvd 76
Oranjestad
ALHIER


RECEIVED FEB 12 2021

Oranjestad: 10 februari 2021

Tema : Agenda di Ehecucion di "Landspakket"

Excelencia,

Firmantenan, Lidernan representante di Sindicatonan di Sector Priva y Publico, ta dirigi nan mes na su Excelencia, pa medio di e carta aki, y ta haci un peticion na su Excelencia Prome Minister tocante e Agenda di Ehecucion di "Landspakket" di e convenio entre Aruba y Hulanda.

Por a constata despues cu a haya e prome informacion di Gobierno di Aruba cu e proceso tocante e tema ariba manera menciona, ya a cuminsa y nos tin preocupacion grandi pa cu esaki.

Asina nos por menciona cu investigacionan ya ta tumando luga y documentonan ta keda prepara pa por cumpli cu e fechanan relevante cu a keda stipula.

Den un pais democratico cual Aruba tambe ta un pais cu tin e signatura aki, nos como Sindicatonan mester haya participacion activo den deliberacion y reunionan ariba aspectonan di e diferente sectornan cu ta wordo menciona den e "Landspakket". Na un manera madura y habri nos kier trese nos vision, opinion y ideanan ariba e rumbo cu nos pais tin cu tuma pa futuro.

Nos como Sindicatonan di Sector Priva y Publico ta representa mayoria di e trahadonan humilde cu ta labora tur dia den e diferente sectornan cu Aruba conoce, sin inclui ningun. Ta na su luga cu nos participacion activo y envolvimento den reunionan clave ta di suma importancia pa hunto nos por mehora nos situacion cu nos ta aden ya pa lunanan largo. Manera nos como Sindicatonan por a nota, e agenda di ehecucion ya ta na vigor y nos ta teme cu nos voz no lo haya oido serio cerca Gobierno, manera nos ta desea.

No por ta asina, cu Gobierno cu diferente trabaonan cu tin cu keda cla den e periodo corteo te april 2021, ta bin y impone cambionan ariba tereno laboral na un forma unilateral. Especialmente si esakinan lo tin consecucionan menos positivo pa e clase trahador. Awor ta e momento cu hunto nos mester dialoga y fiha metanan importante pa mehora nos situacion economico y social. Nos pais ta pasando den periodo dificil y ta nos deber pa na un manera digno nos defende e interes y bienestar di nos trahadornan y nan famianan y duna nan e atencion, respet y balor cu nan merece.

Nos como Sindicatonan ta di opinion cu Gobierno tin cu cumpli cu su responsabilidad cual ta inclui tambe e deber di dialoga y comunica na un manera transparente cu e gremio Sindical pa nos por ta patricipe den escohenca di e rumbo cual nos como pais lo tin cu tuma. Nos ta para dilanti retonan dificil y cambionan drastico, y nos sigur No por keda man cruza y laga esakinan tin consecucionan desagradabel pa nos miembronan.

Nos ta confia cu Gobierno na un manera habri y transparente lo involucra sindicatonan den tur deliberacion y toma di decision cu ta trata e posicion di nos miembronan trahador den Sector Priva y Publico.

Pa finalisa nos ta urgi su Excelencia Minister President pa honra nos peticion pa dialoga y participa den e reunionan clave, unda e voz di e clase trahador tambe na un manera serio y responsabel ta keda scucha. Nos ta urgi pa nos haya e oportunidad pa trese nos puntonan ariba mesa manera debe ser. Mirando cu e trayecto ya a start sali dia 1 di februari 2021 nos No por ni kier keda warda.

Nos lema ta: Participacion activo y directo di representantenan di Sindicatonan di Sector Priva y Publico!

E clase trahador por medio di nos como Sindicatonan Priva y Publico kier traha ariba e mihor modelo pa hiba nos pais Aruba dilanti pa proximo generacionan por tin tambe un mihor futuro!

Atentamente,
Den nomber di Sindicatonan

RECEIVED FEB 12 2021

ABV	 ALVAST	 U.P.A	FTA	 TOWA
 SADA	 SEPPA	SCCA	 SIMAR 11-02-2021	SIMBA
 SIWA 10 Febre 2021	 SPA	STA	 ST	TOPA
 UEA 10-2-2021	 OPPA			